



Basler Bebbi Stamm 2014

DÄMOONEDÄMMERIG

Mit em Finger druff zeige nutzt immer

Gesehsch Du die Gschtalt? Dött ääne! Das Gschpängscht!
I zeig Dr s, luegg aane, das weggt Dini Ängscht
vor Unrächt, vor Gwalt, vor Allem und meh no:
Vor staatlich subventioniertem Armani-Deo.
Dasch s Böse! Dasch s Unheil! Und zwor in Person!
Machsch nütt gege dä muesch wüsse mi Sohn
herrsche lutt Erfahrigsschatz
bald Zueständ wie uffem Claraplatz.

Drum fagglet nit lang und sperret dä Schleeger
ins Loch yy zu all däne andere Neeger
wo unser Land wänn ruiniere
Du Carlos! Du Monschter! Di sott me-n abfiehre
ins Arbeitslager! Aber nei - dasch verbotte
Du Kuschelrichter in Batik-Klamotte!
Du bisch dra tschuld, dass böösi Dämoone
in Hüüsli mit Minergie P-Standard wohne!
Du Sozi! Du Guetmensch! Du Heilpädagog!
Du Wald voll mit Affe! Du Sau vor em Troog!
Verbrootisch mit Dine-n Erziehigs-Prögrämmli
wärtvolls Stüürsubschtraat für d Drämmli.
Du Grosskotz! Du Zürcher! Du Maa in dr Noot!
Du Champions League ÖV-Verwaltigsroot!
Du Obschtruggzionischt! Moralinsuure Spiesser!
Du Autobahnzuebringerspuureschliesser!
Du fahrsch die Kaare voll gege d Wand!
Stohsch aane verzellsch das seyg alles guet plaant.
Du Pedeschtriant! Du Sauglattischt!
Hesch Glaikarietheit mit Zynik vermischt.
Und dött! Ggesch dä Gloon? Mit gschminggter Fassaade
Lauft er mit uff dr Antisemytte-Paraade
Glaubsch ärschthaft dasch glatt, Du Vollzyttgloobi?
Zum Glügg gitts no uffgweggti Islamophoobi
wo bruuni Dämone z bekämpfe wüsse
(am beschte uff Facebook im Status go disse)
Du Kreativwirtschaftler! Du Glaine!
Mit Löffel gfrässe und ganz gross am maine
Deggsch uns yy mit Naaziverglyych
Behauptisch dr Moslem wott gärn zrug ins Ryych
Du Antirassismus-Stroofnorm-Exämpel!
Du Glaigaischt! Du Grossmuul! Y stell Di in Sänggel!
Mit gschtreggtem Finger machsch ein uff wichtig
zeigsch mit eim uff dr Gloon, zeige drey in Di Richtig.
Gäll Schwarzer? Du Schlange! Du Stüüroptimierer!
Du schaadisch ganz Düttschland, Du bisch e Verlierer
in däm Spiil mit Moraalduumezwinge.
Abfiehre an Styrr-Pranger z Eegerkinge!
Du Beamte! Du Verwalter! Du Justin Bieber!
Du Softwareentwiggligsufftraagsusschriiber!
Du ruiniersch uns no alli – Di Cousin isch z tüür!
Zieh das Feriedorf ab vo minere Bundesstüür!
Und a propos abzieh, Du Uffwandsentschädling!
Du BKB-Bängger! Du Berootigsmandätling!
Du Volksverträter in eigener Mission
längst Klass Nüünezwanzig denn noonig als Lohn?

Du Mandätlisammler! Du Praktikumszogger!
Du Falschdeklarierer! Du Sässelhogger!
Du ziehsch uns doch ab wie sälli Schwoobe
Du Expat! Du Fötzel! Vom Bruederholz oobe!
Di Putzfrau kunnt mit Kind und Keegel.
Du Wirtschafts-Migrant! Du Sozialstaats-Flegel!
Du stöörsch unser dänggmollgschützts Landschaftsbild!
Du Blocher! Du Spaltpilz! Machsch alli ganz wild!
Ziehsch Grääbe, bausch Muure und glaubsch so wurd besser
Du Bländer! Du Gambler! Du Dichtestresser!
Beschwöörsch die Dämoone, sääisch Missgunscht und Hass
Für Di, für d Partey, geg‘ die herrschendi Klass
Meergsch s nit, Du Maa-vo dr-Strooss-Verdrätter?
Und alli Ihr andere Dämoone-n-Aabätter?
Uff Eurem Monschter-Fäldzuug, ihr Kälber
Sinn die gröschte Monschter Ihr sälber.
Esoo gohts Spiil wytter, dr Kreis duet sich schliesse
s gitt überall Monschter wo alli druff schiesse
Am Änd profitiert - und das isch s fatale
Numme d Altpapierbyygi dangg Ufflaagezaahle
Drum dängg an dä Satz, verschloosch nöggst Moll s Gschirr:

Dr Dämon in Dir isch dr Dämon in mir.

...
D Lampe isch geil, si hett d Form vomene Keil
isch plottet, gnieted und gspannt mit eim Seil
Si lüüchtet und funggled und glänzt wie ne Schatz
Am Zyschdig uffem Münschterplatz

...
Di Bueb hätt e Schissbolle Freud do wett y
Miecht är Fasnacht de Bebbi (079 651 14 26)